

欽
定
全
唐
文

欽定全唐文卷八百四十九目錄

李元龜

請令貶降官歸葬疏

李盈休

禁敘勲越次奏

杜崇龜

請修省以塞天變表

于邁

請禁妄言投匭疏

趙鳳

上兩朝實錄奏

請撰兩朝實錄奏

請纂集典禮奏

論四帝實錄奏

諫皇后拜張全義爲養父疏

劉贊

乞詔所司重定朝議奏

請申法令疏

王彥鎔

請令晉絳慈三州供郊廟羊犢奏

馬縞

諸王納妃公主下降不合於宮殿門行揖讓禮疏

改服制疏

追尊不宜兼用帝字議

請依兩漢故事別立親廟議

夏侯坦

申明關防奏

張守吉

請量減重囚封事

馬勝

上封事疏

蕭淵

褚氏遺書序

史在德

朝廷任人濫進疏

張延朗

請節國用表

趙德鈞

奏契丹阿保機薨逝狀

馬重績

請改正漏刻法疏

上調元新歷疏

范延光

請捕盜用重法奏

欽定全唐文卷八百四十九

李元龜

元龜後唐清泰元年官刑部郎中

請令貶降官歸葬疏

開成格凡貶降官本處春秋以存亡報省如沒於貶所有
骨肉許歸葬如無骨肉本處便與埋葬

李盈休

盈休後唐清泰元年官司勲郎中

禁敘勲越次奏

奉詔各令於律令格式內抄出本司合行公事本司職典
勲官近日凡初敘勲便至柱國臣見本朝承平時至於位
至宰輔藩臣其勲亦從初敘蓋示人歆歷功用之重也勲
格自武騎尉七品至上柱國正二品凡十二轉今後羣官
得敘勲首並請自武騎尉依次敘進無容隔越

杜崇龜

崇龜後唐清泰初官翰林待詔右贊善

請修省以塞天變表

近日星辰變度苦雨霖霖是生靈共感之災致緯象垂芒

之異惟宜修德以答元穹臣竊以修德遍在君臣非獨在
於君父自古創業守文之主未有無災變者但能修德省
躬則化災爲福臣見今月三日夜五更初有二星變易一
出軒轅前路一出室壁之間凡五星之氣不合五行一德
稍虧五星變異臣恐自戰爭已來或有功臣義士枉抱幽
冤或有名山大川失於禋祀今九月震雷極爲異事雷者
天之號令八月收聲今震伏不時是號令失節之象陛下
繼覃赦宥虔禮神祇惟德動天其災必退更宜師古以合
天心惡殺好生資於睿化

金史卷之四十六
于邁

邁後唐清泰二年官刑部郎中

請禁妄言投匭疏

臣忝掌刑名合論法律臣見比年已來有前州縣官或假
侵官不量事體皆投匭乞官況大朝取士之門有舉有選
苟有長才茂器舉選安敢滯留國家置匭之意本爲訴冤
士人乞官安得造次又閭里淺識濫繇官路妄有求請不
顧格律條章所司以陞下方開言路不敢是非典法是國
家大經誰可析言輕議此後凡投匭上言乞官亂法者望

下所繇法司勘驗可否

趙鳳

鳳幽州人仕梁爲博州刺史判官遷鄆州節度判官後唐莊宗取鄆州得鳳以爲扈鑾學士同光二年授禮部侍郎天成四年拜門下侍郎同中書門下平章事尋罷爲安國軍節度使清泰初召還授太子太保二年卒

上兩朝實錄奏

先奉勅旨纂修太祖武皇帝莊宗光聖神閔孝皇帝兩朝實錄進呈者臣學虧富贍功愧裁成職司獲奉於簡書祖

述濫承於綸旨國家神符運祚代出忠賢始祖自太宗朝
初鎮鍾離爰崇官族帶礪之紛華不絕鼎彝之盛美可尋
懿祖昭烈皇帝立功元和翼戴章武東平淮蔡西闢河湟
憲祖文皇帝旣紹家聲愈遵堂構破晁夷而還貴主誅潞
孽而定徐方仗鉞分憂振雄名於聞服維城作固濬靈派
於天潢太祖武皇帝投袂勤王誓心報主拯三朝之患難
邁五霸之英威經綸旣叶於上元眷祐乃延於下武莊宗
神閔皇帝謀猷特立睿哲遐宣訓卒練兵櫛風沐雨纘崇
鳳歷恢三百載之世功平盪梟巢刷四十年之讐恥一登

大寶四換周星其閒天地參舒君臣善惡旋自宮闈變動
簡牘散亡遂徧訪於見聞庶備詳於本末修撰朝議郎左
補闕張昭遠博於記覽早預編排自今六月一日與同職
官員等共議纂修獲成紀錄臣叨司筆削比乏史才如甘
英妄測於河源裨竈強論於天道殺青斯竟代斲增慙又
以三祖追尊有殊受命約之舊史必在正名謹敘懿祖書
一卷獻祖書二卷太祖書一十七卷並題目紀年錄先帝
自龍飛晉陽君臨天下以日繫月一十九年謹收成實錄
三十卷誠多紕繆仰瀆休明顧鉛素以驚心塵冕旒而浹

背

請撰兩朝實錄奏

自宣宗朝已來時歷四朝未有實錄年代深遠簡牘散亡
更歷歲時轉失根本自中興已來累於諸道購纂四朝日
歷報狀百司關報亦恐已曾撰到實錄值亂亡失乞下兩
浙湖南巡屬購募四朝野史及除自報狀關報等庶成撰
集之功

請纂集典禮奏

當館職備編修理無曠失將美惡而具載庶古今以同風

垂訓將來傳範不朽實有國之重事乃設教之本根伏自
寇盜寢興皇唐中否四朝之聖君令命寂寞無聞數世之
忠臣楷模湮淪罔紀至於后妃貴主帝子皇孫禮樂廢興
制度沿革不偶文明之運難崇祖述之規旣遇昇平須謀
纂集

論四帝實錄奏

當館奉勅修懿祖獻祖太祖莊宗四帝實錄自今六月初
一日起手旋具進呈次伏以凡關纂述務合品題承乾御
宇之君行事方云實錄追尊冊號之帝約文只可紀年所

修前件史書今欲自莊宗一朝名爲實錄其太祖已上並
目爲紀年

諫皇后拜張全義爲養父疏

臣叨被睿慈獲親密勿在可言之地居掌誥之司其或事
異常規禮關草創程式先謀於國輔封章善貢於天聰庶
顯公忠免貽錯失今月九日宮傳命令修張全義書題將
行父事之儀有玷君臨之道旣行文翰難決否臧奉行則
罔叶國經違命則恐虧臣節遂修記事取則宰臣貴動合
於楷模期永垂爲規範以茲奉職庶顯致君臣聞履萬物

者天載萬物者地非聖主無以體乾道非賢后無以法坤
儀百代攸同二儀無改伏惟陛下恢張九五統御元黃外
設明庭內崇陰教言動而華夷知仰弛張而幽顯欽承張
全義雖位極於王公而名不離於臣校承陛下曲旨受皇
后重儀致素纛章不防輿論臣又聞纂洪基者真主行直
道者忠臣不可務一時之緘藏失久長之體制得不恭陳
手疏罄露血誠庶裨益於神聰免隳弛於王度伏乞皇帝
陛下俯容狂瞽動畏簡書時開睿敏之懷允守文明之訓
使聖后式全其內則元臣可保於令圖永揚日月之光載

理乾坤之體臣職叨侍從名忝論思儻避事以不言是偷安而冒寵

劉贊

贊魏州人少舉進士累遷戶部員外郎後唐天成中厯知制誥中書舍人遷御史中丞刑部侍郎改祕書監兼秦王傅秦王得罪長流嵐州清泰二年詔歸田里卒年六十餘乞詔所司重定朝儀奏

往例應諸道節度使及兩班大寮凡對明庭例合通喚近日全廢此義伏乞特詔所司重定向來格品若合通喚准

舊施行中書帖四方館令具事例分析申上據狀稱舊例
節度使新除中謝及罷任赴闕朝見合得通喚文班三品
以上官武班二品以上官新除中謝及使回朝見亦合得
通喚

請申法令疏

臣聞信者使民不惑義者使民知禁非信無以彰明德非
義無以顯聖猷此乃三代英風百王令則伏惟陛下恭臨
寶位虔紹鴻圖握金鏡而照萬方運璇璣而調四序遐敷
至德廣納忠言凡列周行許陳封事雖皆聽覽而尚寡依

行縱所依行亦未遵守自此或有益國利人之術除姦去
弊之謀可以擇其所長便爲允制仍乞特頒詔令峻立條
章豈惟示信義於域中抑亦振威風於海內旣遵法度必
致治平矣

王彥鎔

彥鎔後唐司農卿清泰二年爲太僕卿

請令晉絳慈三州供郊廟羊犢奏

國家四時祠祀郊廟羣神當時供應羊犢皆是前一月於
度支請錢付行市人買雖得供事終匪度程伏惟舊例祀

羊獮晉絳慈三州每年供進純白羯羊一百一十口赤黃特獮子四十頭內一十五頭蘭栗二十五頭角握乞下三州每年依例供進本處以省錢收市

馬編

縞以明經登第又登拔萃科仕梁累官太常少卿後唐同光中遷中書舍人明宗時坐覆獄不當貶綏州司馬復爲太子賓客長興四年遷戶部兵部侍郎清泰初改國子祭酒三年卒年八十贈兵部尚書

諸王納妃公主下降不合於宮殿門行揖讓禮疏

臣聞詩美何穰傳稱築館將就肅雍之德必分內外之規故曰主王姬者自公門出舊禮以几筵告於宗廟以候迎者故於廟之外朝門築館得禮之正也昔漢賈誼上書云古者見君之乘車必下見君之几杖必起入正門必趨又孟子云朝廷不越位而與人言不踰階而相揖孔某過位色勃遽瑗望闕趨風近亦有僕射與員外郎共列謝官班次蓋以公器不私尊無二上亦得禮之正也臣竊以入公門必趨不踰階相揖著於前史實有舊文則豈可以臣下而於宮殿門庭行賓主揖讓之儀使華夏觀禮之人惑於

非據言動必書之史疑爽彝倫臣雖處典司寧分禮道以其所見恐未合宜伏乞宣付中書門下參酌可否施行

改服制疏

古者禮嫂叔無服文皇創意以弟兄之親不宜無服乃議服小功今令文省服制條爲兄弟之妻大功不知何人議改而寘於令文

追尊不宜兼用帝字議

伏准兩漢舊事以諸侯王宗室入承帝統亦必追尊父祖修樹園陵西漢宣帝東漢光武孝享之道故事俱存自安

帝入嗣遂有皇太后令別崇謚法追曰某皇所謂孝德孝穆之類是也前代惟孫皓自烏程侯繼嗣追父和爲文皇帝事出非常不堪垂訓據禮院狀漢安帝已下若據本紀又不見帝字伏以謚法德象天地曰帝伏緣禮院已曾奏聞難將兩漢故事便述尊名請詔百官集議

請依兩漢故事別立親廟議

伏以宗廟立制今古通規損益所宜徵求可見伏惟陛下俯徇羣願入繼丕基率土推誠遐方向化臣是以竊規舊典敢有上聞伏見漢晉以來以諸侯王宗室承襲帝統除

七廟之外皆別追尊親廟漢光武皇帝立先四代於南陽
其後自安帝以下亦皆遐考前修追崇先代四時禋祀陳
豐潔於豆登多士駿奔認等差於藻梲伏以陛下奄有四
海爲天下君雖繼統承祧無忘日慎而敦本崇往尚鬱時
思伏乞以兩漢舊事別立宗廟於便路履霜露以陳誠薦
馨香而盡敬禮於是在誰曰不然

夏侯坦

坦後唐清泰三年官司門郎中

申明關防奏

去年六月詔京百司舉本司公事當司官屬關令丞及京城諸色人出入過所事久不施行其關牙官守捉權知者伏以關防以備奸詐令式素有規程既奉綸言合申職分關防所過請准令式

張守吉

守吉後唐清泰三年官吏部員外郎

請量減重囚封事

伏覩兩道興兵所宜備慮臣恐京師天下州府所禁囚徒獄戶不完凶徒多狡或踰垣破械結黨連羣或聚綠林或

奔逆壘以此爲患事狀非輕臣望所禁重囚除惡逆放火
殺人外可恕者量減本罪一等斷遣兼州縣近山澤人烟
闊遠處量令州縣置舖警巡以防聚集

馬勝

勝後唐清泰中官深州司功

上封事疏

夫道貴適時謀須應務不可專遵前古不可苟徇今時必
在合宜方能致理臣見賊盜律凡盜竊資財多少及放火
燒場據所燒物數爲錢數裁斷比來法司嘗行此律令若

情敦去殺道在恤刑欲令惡鳥移聲小人革弊致風行草
偃須以猛濟寬臣竊見鄉村人有殺牛賭錢嗜酒不事家
產者初則恣其凶頑後則利於財物若以嚴刑止絕因茲
蟻結蜂屯便成羣盜耳臣以爲但是竊盜不計財物多少
及放火刦舍並望且行極法俟餘風稍殄澆俗旣移然後
用輕刑未爲晚也臣又見諸州置捕賊巡務比來以備警
巡近者卻被爲非人詐爲巡司刦盜閭里旣難辨認爲惡
滋深乞一切去除此務凡盜賊出於百姓其原出於屠牛
賭博飲酒不務營生請下諸州府巡屬普令沙汰此色之

人嚴刑條法則無盜矣何必別置巡司臣又見州縣鄉村有力戶於衙府投名服事如有差役祇配貧戶臣請州縣節級立定人數其餘令歸田里卽不困貧民

蕭淵

淵後唐清泰時人

褚氏遺書序

黃巢造變從亂羣盜發人冢墓掘取金寶遇大穴焉方丈餘中環石十有八片形制如柳其蓋穴石題曰有齊褚澄所歸啓蓋棺骨已蛇蟻所穴環石內向文字曉然盜疑兵

書移置穴外視之棄去先人偶見讀徹囑鄉鄰慎護明年具舟載歸欲送官以廣其傳遭時兵革不息先人亦不幸遺命異物終當化去神書理難久藏其以褚石爲吾櫛之石實隱則骸骨全褚石或興吾名亦顯淵募能者調墨治刻百本散之餘遵遺戒先人諱廣字叔常

史在德

在德蜀人後唐末帝朝官太常丞

朝廷任人濫進疏

朝廷任人率多濫進稱武士者不閑計策雖披堅執銳戰

則棄甲窮則背軍稱文士者鮮有藝能多無士行問策謀則杜口作文字則倩人所謂虛設具員枉耗國力逢陛下維新之運是文明革弊之秋臣請應內外所管軍人凡勝衣甲者請宣下本部大將一一考試武藝短長權謀深淺居下位有將才者便拔爲大將居上位無將畧者移之下軍其東班臣寮請內出策題下中書令宰臣面試如下位有大才者便拔居大位處大位無大才者卽移之下寮

張延朗

延朗汴州開封人仕梁爲鄆州糧料使後唐天成中累拜

忠武軍節度使長興元年授三司使特進工部尚書充諸道鹽鐵轉運等使歷泰寧雄武軍節度使末帝卽位遷吏部尚書兼中書侍郎平章事判三司晉祖入立被誅

請節國用表

臣濫承雨露擢處鈞衡兼叨選部之銜仍掌計司之重況中省文章之地洪鑪陶鑄之門臣自揣量何以當處是以繼陳章表疊貢情誠乞請睿恩免貽朝論豈謂御批累降聖旨不移決以此官委臣非器所以強收涕泗勉遏怔忡重思事上之門細料盡忠之路竊以位高則危至寵極則

謗生君臣莫保於初終分義難防於毀譽臣若保茲重任
忘彼至公徇情而以免是非偷安而以固富貴則內欺心
腑外負聖朝何以報君父之大恩望子孫之延慶臣若但
行王道惟守國章任人必取當才決事須依正理確違形
勢堅塞倖門則可以振舉宏綱彌縫大化助陛下含容之
澤彰國家至理之風然而讒邪者必起憾辭憎嫉者寧無
謗議或慮至尊未悉羣謗難明不更拔本尋源便俟甘瑕
受玷臣心可忍臣恥可銷只恐山林草澤之人稱量聖制
冠履軒裳之士輕慢朝廷臣又以國計一司掌其經費利

權二務職在招收將欲養四海之貧民無過薄賦贍六軍之勁士又藉豐儲利害相隨取與難酌若使罄山採木竭澤求魚則地官之教化不行國本之傷殘益甚取怨黔首是黷皇風況諸道所徵賦租雖多數額時逢水旱或遇蟲霜其閒則有減無添所在又申逃係欠乃至軍儲官俸常汲汲於供須夏稅秋租每懸懸於繼續況今內外倉庫多是罄空遠近生民或聞飢歉伏惟朝廷尚添軍額更益師徒非時之博糴難爲異日之區分轉大竊慮年支有闕國計可憂望陛下節例外之破除放諸項以儉省不添冗食

皆失其正請依古改正

上調元新厯疏

厯象王者所以正一氣之元宣萬邦之命而古今所記攷
審多差宣明氣朔正而星度不驗崇元五星得而歲差一
日以宣明之氣朔合崇元之五星二厯相參然後符合自
前世諸厯皆起天正十一月爲歲首用太古甲子爲上元
積歲愈多差闊愈甚臣輒合二厯創爲新法以唐天寶十
四載乙未爲上元雨水正月中氣爲歲首

范延光

延光字瓌相州臨漳人後唐同光中拜檢校工部尚書明
宗卽位擢宣徽南院使遷檢校司徒遷樞密使出爲成德
軍節度使長興中加同平章事清泰中徙宣武軍節度使
加檢校太師兼中書令晉祖入立封臨清王天福二年舉
兵反尋敗降改封高平郡王以太子太師致仕爲楊光遠
所殺贈太師

請捕盜用重法奏

副使王欽昨報管內頻有盜賊剽劫坊市鄉村差兵巡捕
嚴切隄防緣此歲蠶麥不熟游惰之徒結衆爲惡或傷殺

攘奪及捕獲處斷又前後法條不一以天成二年勅應山林羣盜害物殘人若捕捉勘結不虛全家處置有偶然劫盜者正身准法知情者同法又以長興四年勅據天成勅只爲界內連結黨惡害物殘人所以誅族此中與之初權行之法若斷獄只坐此條恐違於律令今後結黨連羣爲害者并男十五已上並准元勅處斷其父母兄弟妻女小兒一切不罪有骨肉中與賊同惡者亦同罪如同謀不行或受賊不受賊則准律科斷臣當管賊盜屢發蓋見用法太寬只罪一身又不籍沒家產又不連累家屬得以恣行

克惡今後捕盜權行重條俾其知懼易爲禁止

欽定全唐文卷八百五十目錄

林弼

唐太子少保贈太子少傅朱漢賓諡議

何光乂

進策

第二策

杜遷

請開種荒田策

周元休

東嶽冥福禪院新寫藏經碑

竇溫顏

請肄武策

高居誨

于闐記

任贊

請州縣官先考試貢舉人表

崔居儉

請停預用員缺奏

鄭雲叟

辭徵聘表

姚顗

進實錄表

請修齋宿屋宇奏

請六典分銓奏

請禁州郡供億疏

鄭韜光

請斷罪詳檢格律奏

請禁州使影占人戶奏

薛融

請停營作疏

安重榮

請討契丹奏

欽定全唐文卷八百五十

林弼

弼晉天福二年官太常博士

唐太子少保贈太子少傅朱漢賓諡議

漢賓常恃倜儻不習廉隅過鄴都姦卒之流言時銷叛亂
卻華師親隨之浮議俗致安康開國承家忠貞保義而又
散已俸而代逋欠闢荒榛而種麤蕤民有袴襦之謠野無
荏蒲之患安民禁暴威惠兼行而又知進退存亡之理得
善始令終之名亦所爲知幾其神也諡法忠道不撓保節

揚名曰貞愛民好學寬裕慈仁曰惠請諡貞惠

何光乂

光乂晉天福二年官汴州浚儀縣主簿

進策

竊見諸處邊郡小縣多是山鄉雖舊有勅正官滿時不許差攝充替無那遠地多越明規攝官旣已到來見任豈敢違拒況聞所差攝者大半是本州府使長臨時與旋署虛銜強替見任正授官員其最不可者頗有當年之內或兩度三度替移來者須逆去者須送配從門內率自鄉中悉

是權行誠非本分如斯得倖豈肯力官非惟紊公當且害
物自今後伏乞特行明勅顯自新朝其邊郡縣官仰節度
刺史或有見任因事停罷卽許差曾入仕者權令撫綏仍
又須候正官到官不可以攝替攝官或經半載或過一年
如能志遠脂膏道著清白招添得戶口徵督得賦租百里
傳聲羣黎咸惠衆狀舉請卽仰奏聞特乞大朝便行真命
如此則皇王恩遠赤子幸深免被煩苛漸期蘇息

第二策

竊見諸道選人合格下解不出十月立定三旬此則常程

向來舊制卻是或有因解樣所誤式例稍虧字內點畫參
差印處高下訛舛便乃駁犯致有艱難其如有七年八年
選期千里萬里途路羈窮取士辛苦到京若粟錯不容乃
滯塞無計自今後伏乞特行明勅顯布新規其黃衣選人
只驗出身文書已有前任者據考牒及解繇厯子轉年得
盡合格不許便與判行小小不賜駁犯則天下感明時事
易聖主恩寬不使吏徒得行奸計者

杜筵

遼晉天福二年官隴州長史

請開種荒田策

伏見近年百姓頗遇災荒縱納得王租卽不充口食此蓋播種不廣頃畝無餘旣稅外無溢數之苗致民中有不及之弊且國以民爲本民以食爲天苟百姓不足君孰與足伏請曉示天下應有荒田一任百姓開種候及三年外卽檢照所開種頃畝多少量納一半租稅所貴國家富饒上下通濟者

周元休

元休晉天福二年官朝議大夫行殿中侍御史

東嶽冥福禪院新寫藏經碑

述夫元黃判而清濁分三才敘而萬彙育散乎元素簡易

之體猶存降

闕一字

中庸澆薄之風益扇雖羣分類聚上智

下愚靡不惡其死而愛其生

闕一字

其得而

闕一字

乎喪緬惟

盤古爰及當今咸欲致身於常樂之鄉立名於無疆之域

而嗜慾窒性好尚由心

闕一字

苦海而

闕一字

迴蹈迷途而繼

踵竟致惡而必得愛而必忘浩浩

闕一字

猶百川之

闕一字

者

闕二字

而言也至於用慈儉

闕三字

體沖虛而爲質駕

闕二字

轡

之侶俯仰八紘餐霞御氣之流逍遙六合或丹邱暫別或

羽化俄歸亦不能忘情於生死之源絕跡於

闕一字

夷之境

降茲以往何足道哉洎乎西域誕靈曜列星而應瑞漢庭

入夢挺金質以呈祥法被寰中言超象外遠究天人之際

廣開方便之門現無生爲不死之

闕一字

示有相入無形之

域修正真之

闕三字

網能除

闕三字

之至明闇室皆曉觸類斯

長無幽不通元化普洽而不窮虛谷有聲而必應至矣哉

總萬法而爲方卽絕跡出塵無如佛者夫其道也大慈廣

運宏濟無方闢衆妙

闕二字

元關

闕一字

啓導一乘之教覺路

難登寂滅虛空真如綿邈窈冥莫測識智難量是知翦長

空者必假以羽翰濟巨浪者須資於舟楫將欲以言觀法

以法觀心窺解脫之門究

闕五字

是者即莫

闕一字

乎經夫其

要也始則演以一音次則偈於四句變拳石爲千峯之秀

導勺水爲萬派之源於是貝葉緹紬流行斯廣龍宮寶藏

闕二字

攸繁莫不指示迷方津梁彼岸使

闕二字

珠者必求罔

象涉麗水者果獲祥金披文則萬象皆呈得意則一言以

蔽能宏是者其唯釋門之達士哉即今經藏主隱公是其

人也公生於鎮州靈壽縣俗姓裴氏法名志隱出家於奉

恩寺受戒於光化寺幼無童心長有佛性名山勝境靡不

經遊先止於岨嶸山光化寺修行二十餘年剃度三十餘人遠近傾依縉俗瞻仰是院先有主者僧順公本貫定州深澤縣人也俗姓李氏法名智順出家於本州開元寺受業於法華院後因巡禮遂至山門與先院主僧道言相繼住持六十餘載剃度二十餘人修崇院宇功德佛事並已周圖濮陽化召得施主李彥章等特建鐘樓經藏雖斤斧丹青煥乎畢備而經文典誥咸且闕諸遂乃堅請主持假其緣化旣從請託遂果成

闕三字

募彼信心資乎敏手堅比

移山之志勤用覆簣之功僅越十年始就前願凡寫藏內

經律論及聖賢傳記等共五千四百八十卷并新紙墨咸

得精詳永用緘藏是圖悠久今院主僧行闕一供養主僧

行感典座

闕一字

一行隱並禪林擢秀

闕一字

水澄波護戒珠而

如握靈虵傳祖印而非關墮鵲三千世界不染六塵八萬

法門皆歸一念身居五濁蓮花生於淤泥闕一燃百燈太

陽入於闇室住持真境炳煥釋闕一字況方嶽之中岱宗爲

首地臨齊魯境壓淮沂玉几金牀宛畱勝迹天門日觀下

瞰長空爰屬盛明卽期封禪方今千載啓運四境無塵緇

徒雖廕於法門野老咸知其帝力府主太師相公勲高社

稷

闕一
字

列山河下車而比戶咸蘇出令而連營盡肅論兵

玉帳謀深起翦之流禮士金臺價重鄒枚之選故得時康

俗阜氣淑年和成此莊嚴

闕二
字

風教遂釋子歸依之願契

如來付囑之言得不備以良因紀之貞石元休功虧力學

敏謝生知幸見託於斯文實懷慚於染翰式揚功德迺述

銘云

浩浩浮生茫茫曠劫惡積禍胎福生善業覺路難尋愛河

易涉瞻彼波瀾

闕二
字

舟楫爰有大士百億化身戒珠不類

闕一
字

鏡無塵演茲妙法濟彼蒸民門闢覺路指示迷津妙

旨幽深微言祕奧窅窅靈源茫茫元造孰究真宗孰探法

寶

闕二字

欲探必資經誥猗歟

闕一字

典列聖徽猷一音

闕一字

演萬法斯流雕金鏤玉貝葉緹紬將求佛性捨此何求偉

哉達士成此至功

闕一字

乎寶藏宛若龍宮生雖有岸法本

無

闕一字

天長地久永播真風

寶溫顏

溫顏晉天福三年官隰州蒲縣令

請肄武策

兵不可不戰將不可不擇每於月旦宜令教習楚莊立功

而心懼晉文戰勝而色憂居安慮危古之道也此乃鴻圖
永固霸業彌芳

高居誨

居誨晉天福三年供奉官與張匡鄴奉使于闐

于闐記

自靈州過黃河行三十里始涉沙入党項界曰細腰沙神
樹沙至三公沙宿月支都督帳自此沙行四百餘里至黑
堡沙沙尤廣遂登沙嶺沙嶺党項牙也其首曰捻崖天子
渡曰亭河至涼州涼州西行五百里至甘州甘州回鶻牙

也其南山百餘里漢小月支之故地也有別族號鹿角山沙陀云朱邪氏之遺族也自甘州西始涉磧磧無水載水以行甘州人教晉使者作馬蹄木澁四竅馬蹄亦作四竅而綴之駝蹄則包以釐皮乃可行西北五百里至肅州渡金河西百里出天門關又西百里出玉門關經吐蕃男子冠中國帽婦人辮髮戴瑟瑟云珠之好者一珠易一良馬西至瓜州沙州二州多中國人聞晉使者來其刺史曹元深等郊迎問使者天子起居瓜州南十里鳴沙山云冬夏殷殷有聲如雷云禹貢流沙也又東南十里三危山云三

苗之所竄也其西渡都鄉河曰陽關沙州西曰仲雲族其
牙帳居胡盧磧云仲雲者小月支之遺種也其人勇而好
戰瓜沙之人皆憚之胡盧磧漢明帝時征匈奴屯田於吾
盧蓋其地也地無水而常寒多雪每天暖雪消乃得水匡
鄴等西行入中雲界至大屯城仲雲遣宰相四人都督三
十七人候晉使者匡鄴等以詔書慰諭之皆東向拜自仲
雲界西始涉磧磧無水掘地得濕沙置之胸以止渴又復
渡陷河伐檉置水中乃渡不然則陷又西至紺州紺州于
闐所置也在沙州西南云去京師九千五百里矣又行二

日至安軍州遂至于闐聖天衣冠如中國其殿皆東向曰金冊殿有樓曰七鳳樓以葡萄爲酒又有紫酒青酒不知其所釀而味尤美其食粳沃以蜜粟沃以酪其衣布帛有園圃花木俗喜鬼神而好佛聖天居處嘗以紫衣僧五十人列侍其年號同慶二十九年其國東南曰銀州廬州湄州其南千三百里曰玉州云漢張騫所窮河源出于闐而山多玉者此也

任贊

贊後唐明宗朝以太子左庶子遷工部侍郎晉天福四年

爲兵部侍郎

請州縣官先考試貢舉人表

伏以聖代設科貢闈取士必自鄉薦來觀國光將叶公平
惟求藝行蓋廣搜羅之理且非喧競之場伏見常年舉人
等省門開後春榜懸時所習旣未精研有司寧免黜落或
嫉其先達或恣以厚誣多集怨於通衢皆取駭於羣聽頗
虧教本卻成亂階宜立新規以革前弊自今後諸舉人不
是家在遠方水陸隔越者望本令各於本貫選藝精通實
寮一人考試如非通贍不許妄薦儻考覈必當卽試官請

厚於甄酬若薦送稍私并童子盡歸於竄逐冀彰睿化免
紊儒風庶絕濫進之人共守推公之道

崔居儉

居儉清河人少舉進士梁貞明中累官御史中丞後唐同
光中授刑部侍郎改兵吏二部侍郎尚書左丞戶部尚書
晉天福四年卒年七十贈右僕射

請停預用員缺奏

今年選人內八十三人無闕注擬詞訴紛紜蓋因近勅減
選入仕者多門雖可區分難抑詞理請下格式取四月後

合用員闕發遣中書門下奏先以銓曹論員闕遂卻置戶
椽一員諸州一百五十員格式元送闕簿六百四十餘處
後又許超折資序又堂帖令畿赤已上雖擬議許開銓後
除授不合豫請用四月後員闕望於移省限內並須了絕
不得更令選人有詞

鄭雲叟

雲叟本名遨滑州白馬人避後唐明宗廟諱以字行昭宗
朝賞應進士舉不第遂以隱逸終後唐天成中徵爲左拾
遺晉天福初徵爲右諫議大夫皆謝不起賜號逍遙先生

四年卒年七十四

辭徵聘表

臣聞君子有應敵之方因時俯仰介士有不移之操與性
逍遙康堯佐舜者洽道於君臣洗渭巢箕者寄形於天壤
惟聖人之效業在庶物以由庚微臣學圃無成文場不調
頃屬兵交四海怨暴三場梁室亂離走蘭成於荒谷江都
淪覆遁庾袞於天山而又蔡順少孤虞邱三失倉野之女
遠國飄零王祥之男一時彫落喪家室而有鰥在下悲身
世而無處求生因投迹元元委心虛靜長揖當途之客羣

居在野之人幽蘭以備於重襟灌木用成於虛室或臨窗
嘯傲或植杖耕耘樂在其中老而將至西山採藥已有咏
歌北闕彈冠曾無夢想安期綸綍下及煙蘿日月方耀於
太清世胄適躋於高祖任賢勿貳位事惟能衡門不傑之
才繇來有愧詔局殊常之命未敢以聞夫功大者其任尊
職充者其責重任必安於所據責不致於非才方今內服
百工外拜五長百爾黎獻一存至公載惟清朝奚急百士
誠繇陛下天網地絡容無所遺夏雨春風恩無不及青陽
振其沉穎旭日起乎幽棲將令匹微罔不率俾固宜勇別

環堵言隨輯

言勇切

車拜丹地之明廷奉早囊之清職東望

心踊其如病何賦分隱淪滅思聞見九徵而往雖有語於

莊周三召不行獨無求於殷浩仰祈皇鑒俯宥愚衷

姚顗

顗字伯真京兆萬年人少舉進士梁貞明中累遷中書舍
人入後唐歷兵吏二部侍郎尚書左丞拜中書侍郎同中
書門下平章事晉祖入立罷爲刑部尚書遷戶部天福五
年卒年七十五贈左僕射

進實錄表

奉詔臣等同修先皇帝實錄進呈自承天旨尋戒百官同
申太史之舊章徧訪茂陵之遺牒莫不囊螢汗簡寢筆懷
鉛粗成典冊之大綱詎副宸旒之重委臣聞刻木結繩之
代泥金簡王之朝傳茂實於無窮播英聲於不朽良以絃
歌誦美竹帛書勲然則序皇猷而有質有文論帝道而或
疎或密疎則見譏於良史密則利澤於洪源故禹穴藏書
作法永垂於千古橋山刻木化民何止於百年恭惟明宗
聖德和武欽孝皇帝務實去華本仁祖義鄙漢家之霸道
薄用刑名遵老氏之元言克敦慈儉爰自仗義旂於參野

總戎鉞於渠門三紀訓兵奉列聖而重安鼎祚八年御宇
育黎元而別創蘿圖臣厯覽前經詳觀哲后無如先聖居
宗室而扶持景運作維城而屏翰皇家鷹揚豹變之奇獲
屈龍伸之智年纔總角位已建牙輔獻祖太祖之經綸解
僖宗昭宗之禍難東平曹蔡北靜藩渾披榛棘而立朝廷
斬豺狼而興社稷及莊宗失馭寰海橫流方哀義帝之喪
堅守唐侯之位而謳歌遽迫厯數爰歸於是革秦皇漢武
之澆風修貞觀開元之仁政以臣幽淺何以發揮自捧絲
綸如挾冰炭但緣職分難避擬掄臣卽與判館事修撰官

中書舍人張昭遠中書舍人李詳左拾遺吳承範等依約
典謨考詳記注按編年之舊體各次第以分功起龍潛受
命四十年成鳳冊新書三十卷雖研精覃思備振於綱條
而事重才輕仍憂於漏畧加以裝褫鹵莽繕寫生疎旋命
直館右拾遺楊昭儉虔切指蹤專司校勘尚虞舛誤未盡
周旋將冒犯於進呈實倍增於憂負

請修齋宿屋宇奏

明王御宇哲后垂衣必崇郊薦之儀以表君臨之道伏自
陛下興隆寶祚展禮羣神每祈福以爲人必差官而行事

金史卷之五十一
先七日受誓戒於南省后三日各致齋於本司必在精誠
以感靈貺臣伏見南郊壇之側及諸祠壇並無宿齋之
所請下所司量事修建屋宇俾嚴祇事允屬聖朝

請六典分銓奏

近宰臣盧文紀上章請條理選部臣聞事不師古匪說攸
聞又曰仍舊貫何必改作此先王之格言也臣案六典吏
部三銓尚書侍郎分典吏部其格擇人有三實四才孟冬
三旬集人有地里之差若循彼綱條依其格限人無濫進
官得實才只自天成四年十月詔罷侍郎分銓只以尚書

併領正官又闕多是他曹權差才力或有短少遂致發遣
凝滯團集遲留移省既失常規選人隔年披訴臣請卻依
六典分銓朝廷列職分司比期釐務置之閒地何裒分憂
望各委典銓於事爲宜

請禁州郡供億疏

伏以運當昭泰時屬豐成金鑾已議於省方綵仗將離於
上國沿路供億固有舊規況聞詔旨丁寧不許分外科率
所在藩侯郡守竭力推忠奉迎須備於貢輸徵斂或及於
黎庶伏望更加示諭免至煩勞使四海九州遐邇共聞於

聖德千乘萬騎經過不擾於疲民俾諸望幸之心以顯來蘇之義

鄭韜光

韜光字龍府洛京清河人自京兆府參軍累遷諫議大夫給事中梁貞明六年充知匭使入後唐授工禮刑部侍郎天成長興中歷尚書左右丞晉天福初以戶部尚書致仕五年卒年八十贈右僕射

請斷罪詳檢格律奏

臣聞春秋傳曰將賞爲之加膳將刑爲之徹樂此明君之

愛人也伏乞下大理刑部兩司凡經定罪之時結正之際徧覽格律簡驗盡舉勅文討尋俾獲罪者甘心受罰者無怨人知法有畫一之義律無再易之門

請禁州使影占人戶奏

諸縣力及人戶多爲州使影占或臺省投名惟貧民客戶在縣應役例有不均之歎且多僥倖之流請議禁止

薛融

融汾州平遙人後唐天成初授華州節度判官長興四年入爲右補闕晉天福初拜尚書吏部郎中天福二年自左

諫議大夫轉御史中丞改尚書右丞分司西都六年卒年六十

請停營作疏

臣近覩河南畱守高行周狀奏修大內事以大厦旣成燕雀尚猶相賀皇居是葺臣子豈不同歡然則時方屬於多虞事宜停於不急臣聞帝堯古之聖君也其所居宮室則茅茨不翦土階三尺漢文帝古之聖主也欲造露臺以費百金之值尋罷其役莫不道光圖籍德冠古今爲千載之美談作百王之懿範況漢文承三代之基業御一統之寰

區百姓富饒四方寧謐金帛盈於帑藏粟麥溢於囷倉尚
惜其財不從其欲今雒陽宮殿雖有先遭焚毀其所存者
猶且彌滿於帝堯之茅茨而又重有修營其所貴者豈不
倍多於漢文之臺榭伏自陛下一臨華夏再歷寒暄聖猷
雖契於上元皇化未覃於遐徼復又鄴城殘寇厯歲逋誅
黎民猶困於轉輸將士頗勞於攻討庫藏虛竭支費殷繁
此則是陛下宵衣旰食之時非陛下營造宮室之日且百
姓是陛下之赤子也陛下是百姓之慈父也子既有疾父
寧不憂今天下黎民莫非疲弊天下州縣靡不凋殘加以

率斂頻仍徭役重疊尤宜撫恤俾遂蘇舒勿謂愚而可輕
勿謂賤而可棄古人有言民猶水也君猶舟也水所以載
舟亦所以覆舟可不畏乎兼自去年正月已來陰陽繼虧
星曜失度此則上天垂象使陛下修德節儉之戒也固合
修德以應之向使百姓安寧則陛下雖當櫛風沐雨未以
爲苦也若或兆民愁苦則陛下雖處瑤臺瓊室豈得爲安
乎伏願陛下襲帝堯之舊風繼漢文之餘烈且停工役免
費資財使寰海之普寧或修營之未晚則天下幸甚百姓
幸甚

安重榮

重榮小字鐵胡朔州人後唐長興中爲振武道巡邊指揮使後歸晉授成德軍節度累加至使相天福六年舉兵向闕杜重威斬之

請討契丹表

臣昨據熟吐渾節度使白承福赫連公德等各領本族三萬餘帳自應州地界奔歸王化續準生吐渾並渾契苾兩突厥三部落南北將沙陀安慶九府等各領部族老小并牛羊車帳甲馬七八路慕化歸奔俱至五臺及當府地界

已來安泊累據告勞具說被契丹殘害平取生口率畧羊馬凌害至甚又自今年二月後來須令點檢壯強置辦人馬衣甲告報上秋向南行營諸蕃部等實恐上天不祐殺敗後隨例不存家族所以豫先歸順兼隨府族各量點檢強壯人馬約十萬衆又準沿河党項及山前山後逸利越利諸族部落等首領並差人各將契丹所授官告職牒旗號來送納例皆號泣告勞稱被契丹凌虐憤惋不已情願點集甲馬會合殺戮續又朔州節度副使趙崇與本城將校殺僞節度使劉山尋已安撫軍城乞歸朝廷臣相次具

奏聞昨奉宣頭及累傳聖旨令臣凡有往復契丹更須承
奉當候彼生頭角不欲自起釁端貴守初終不衍信誓仰
認睿旨深惟匿瑕其如天道人心至務勝殘去虐須知機
不可失時不再來竊以諸蕃不招呼而自至朔郡不攻伐
以自歸蓋繫人情盡由天意更念諸陷蕃節度使等本自
勲勞早居富貴沒身邊塞遭酷虐以異常企足朝廷冀傾
輸而不已如聞傳檄盡願倒戈如臣者雖是愚蒙粗知可
否不思忌諱罄寫丹衷細具敷陳冀裨萬一